





蟪衣生粵草卷之三

恭和郭子章相奎甫著

序

封太史習易庵先生八十序

萬曆中重人柄國無令擅為恣所私以凌宇內天物  
怒流人事錯錯然若若乎回也憂憂乎闢也士大夫  
內憤卷舌禁聲莫敢一語吾吉三四君子竊憂之始  
同年傳御史思善首發其毒劉御史國基繼彈其私  
欲節收其權星變後鄒進士爾瞻諤諤諍之習學士



時甫引館閣諸臣又諍之大言金玉細言芝木俱格  
不內而重人眎吾吉蓋夜投之壁而質首之讎也無  
幾何三君被重罪去學士斥甌閩甌閩讒者忖忌者  
意設飛語中之學士坐歸里子章時由金陵入粵過  
螺川謁封太史易庵先生稍引譬慰藉先生咲曰世  
好膾惡焦若行不膾世嗜甘逆苦若言獨苦寧得無  
困且又惡知夫齧草飲水者之不便於義臺而芻菽  
太廟者之不短於牧桐乎此寄去耳母嗟不樂也子  
章聞而識之無幾何重人敗國是稍定劉氏之冤雪  
傳鄒二君召還臺省學士起鷺洲趨直鸞坡子章時

由粵入 覲過螺川復謁易庵先生再拜賀甚休先  
生復咲曰裋褐狐貉一衣也菽菽稻粱一食也蓬室  
璇房一室也華輅文軒一乘也是所為春夏秋冬而  
不可常者而 皇路清矣大道夷矣脩正信矣非予  
一介賀也子章復聞而識之今年秋子章由粵入蜀  
學士以司成請告不獲遲迴邑里別予螺江上且曰  
所為戀戀不即去者以老父春秋高明春屆八十歆  
後覽揆之辰執兕觥為壽子何以教我壽了嘗讀荀  
子矣其言曰欲觀千載則審合日欲知億萬則審一  
二子童侍易庵先生久豈第一二可頌先生少精易



五舉不售而攻苦茹澹就數處澤不自悒悒於窮及其授易學士學士魁豫章成進士侍主上顧問宣室先生即以子貴而逍遙園圃佚宕市林縱志於有無之上而不自以為通學士忤當路反褐衣不傳時為薄而先生適然於寄去無一日之戚動乎其容已而謾疏忠伸佞放直舉先生亦眎為春秋不常之道而母嘵嘵於往事以自詫其芬華此子章所耳而目之者先生誠有道人哉貴賤窮達得喪非譽塵垢糝糠也執之則事不執之則道有所執者所以之人無所執者所以之天先生得全其天天乃道道乃久也

其為筭莫之計矣且也學士侍講幄為主上不貳心臣本本原原不極於虎賁秬鬯之錫不止而貞夷粹溫灑然為世程守身養志永貽休問與天壤不弊則其忠也所以為孝也雖然吾古四君子猶之忠也乃三君子高堂懿親有幸不幸易庵先生衆劉淑人眉壽齊德鯁齒偕老令學士得一意啟沃怡神黼黻異日相主上以財紫亩庇蒼黎俾宇內士民推所自而祝延之則天之所以福習氏者蓋郵厚也

少叅韓懷愚年大壽序

萬曆癸未子章繇潮陽守覲主上陞辭還東越歷



金焦絕錢唐則聞今少叅韓公繇諫議大夫分守嶺東是時公方持節出封大藩畫繡吳興子章畏簡書無能迂涂還謁直趨金華造趙太史先生趙先生故子章與公共嚴事為師者先生曰子過吳興見韓諫議乎子章曰未也先生曰諫議有嶺東之命吾道幸甚地方幸甚吾子幸厚哉子守潮三月而觀未諳潮理予承匱東越三年於潮詳矣枕山面海昔稱愍國今其民萌距城而舍耕墾廢者皆昔斬木揭竿未盡駭除者詰盜而孚豚魚難俗樊侈不幸以富聞前守達達墨敗上疑易緇又其郡極嶺東際鬲龍川

螭鳳城距會省若絕域春秋行人車蓋所不道守蓋聞上不必然守不善聞上不必不然祛疑而獲上難故其機在藩臬二大夫而藩大夫鎮於惠只尺番禺當路所不能耳而目於潮者託之鏡焉子姑務為詰盜孚豚魚之政有諫議在即疑子者子行且獲之諫議智足以為源泉行足以為表儀秉理不辟據當不傾令子佐其下風如羨焉水火醞醢鹽梅以烹魚肉予昔坐浮丘窺南海教化未東漸今以副二君吾道東矣奚必自也行之而後為臧子章唯唯辭趙先生度庾嶺還潮不浹月公實節鉞臨之子章從文武吏



受約束後公復致趙先生語且曰吾與君共僂俛加  
志毋忘先生訓也顧是時程鄉諸鍾賊內訌頃之觀  
察鄭公討賊銷馱四竟大救定事聞於朝大司馬  
頗疑賊白晝攫金恐繁有徒城破帑燬金難猝獲公  
解之曰賊惟白晝入也故徒不繁徒不繁故金不越  
屑而猝完頃之克黨陰喝良家子弟曰縣官怒程人  
不若旦且株送夜三五怖公下令曰渠魁已盡殲吾  
子勿問程人始安枕頃之直指公行縣則意之曰嶺  
東令踈地腴彼能皆辭利刻廉懸魚置水乎俗囂民  
好俠彼能皆回心易慮賣劍投戈乎公從容為說解

之曰是故也今則不爾故長吏不即一斥而間闔不  
大捍於文罔頃之賦冊未竣歲金未輸過期者久之  
會省疑潮辟吏老胥得賞緣為姦焉軟齧良擅易民  
數匿課入私家公趣之畢策內賦而解之曰是其人  
鈍鄙勿嫺數一二其涂遥舟車未易即至故賦入而  
吏得逭一歲之罰冊成而民得享十年之利公為政  
惠朝甫朞月道德造物政教適民不暇枚舉茲舉其  
鉅者皆券合於趙先生云云程江之亂守者詰盜孚  
豚魚之謂何乃公所為維持調護令子章方寸之冊  
得信當路載鬼之車終歸說弧國愍而若治地富而



若貧郡遠而若近疑盡祛而上終獲嗟乎公豈私一  
子章哉上不疑則獲上疑則不獲上不獲則守者不  
能一日据其位守者不能一日据其位則公之道德  
政教將雍泮而弗舉今三年於潮稍舉公之道德政  
教弗甚雍泮者子章也所以舉而弗至雍泮者公也  
則趙先生所云吾道幸地方幸非獨子章幸也公以  
是月廿四日為覽揆之辰潮郡倅及十邑長晉而告  
子章曰當以詞祝子章乃術趙先生當日金華之語  
以及公今日嶺東之政於是諸僚吏邑吏闔郡萬姓  
襁然進曰夫使某輩之么麼不即於擯卻者韓公也

韓公百歲夫使十邑民萌之鈍魯不終於盜寇不罹  
於鋒鏑不阱於文法者韓公也韓公百歲子章闔諸  
吏民而進之曰是足壽韓公矣德之理盡施於人其  
在人也內而難見是以先王舉德之頌而為辭語以  
暢其理陳之四方垂之後世令人觀焉子章不佞請  
括吏民語而以潮之江山草木昔受名韓昌黎子者  
著為公頌三章章六句頌曰韓之山維石巖巖豈弟  
君子畏是民岩君子萬年伊耆杖函韓之江維水淙  
淙豈弟君子循是海邦君子萬年申甫嶽降韓之木  
維橡謖謖豈弟君子民顧民復君子萬年永綏百祿



周松岐先生衆劉恭人齊封並壽序

語曰子之能仕父教之忠故 國家官人推恩追父  
若母載在令丙一考績輒䟽輒予以為固然即其子  
以廉初而墨卒塵始而媿末者父母貴如故在今日  
則庚脊重之矣兩京官持牘上奏留斥在銓部不得  
槩叙即叙矣稍不當收其命敎之待四方藩臬守令  
益厲三載內非騰荐剡者勿予既予而墮問敎如制  
蓋恩綸之典其難得而易失如此得之難人競其官  
失之易人愛其父是 國家張弛姦良獎勸忠孝之  
大機也子章則以今畿外官至二千石其父母之封

昨昔郵難何也近制久任積官刺史頗稱貴倨自釋  
禍計日大氏越十載外其父母率日晏不得驕驕康  
武在盛齡艾服此其難於父母者天也刺史縮轂一  
方跡羸務瑣左朱右墨弊弊屑屑非有敏手莫之批  
擣絲賦劑量帑府會稽苞苴伺側蒼黃殊染非有勁  
心傳不變滑此其難於子者人也故二千石之封昨  
他秩郵難也予同年友周明卿甫三十以計部郎出  
守韶州是時封大夫松岐翁衆劉恭人方艾年韶州  
且行翁曰昔韓綜為西京忠憲公詎其亡疑獄問兒  
三尺在手慎亭疑法平反者恭人曰陳亮咨出守荆



南母怒其一夫之勇兒事到重發勿以一夫威裂也翁又曰兒昔佐大司農受計綜覈早作夕惕為江川刻心秉義養二老人母淳熬擣漬予甚驩吾兒惡用易部而郡易江而韶平恭人曰予聞曹溪之水世以為佛佛一人不能佛人人英州之召世以為奇奇在几席怨入民髓願吾兒母水其水母石其石韶州拜教而東入竟肅給惟謹提身子氓省刑茂穡救乏振滯舉善穀士甫三年野無與草民鱣縣邦國有班事文母勝害俗不佞佛涂絕輦石治行為粵東第一兩臺交疏于上上嘉其能下璽書褒之誥封翁官

如韶州母晉恭人是年冬公年方耆指使恭人少翁幾歲而誕與翁同月韶州地在嶺外不得絕漢水為壽意且嘆嘆會章出守潮陽便過豫章其屬某其謁芻議為祝韶州予兄弟中道義心知予眎翁恭人文人行也祝延曼壽豈後曲江諸君惟翁得之天者疑厚而朱幡丹轂之子馴遠膝下於康武之日而成其子為孝惟韶州脩之人者淳懿而操敏手植勁心於紛負嘗省之地而詒其父純嘏此之謂天人全昌子父交相成也翁難老步健貌童韶州名位方隆隆武庫常開文星鎮見事與時繁名與功偕國家誠於



絲綸眷重之乎而惡能為周氏斬也子章家大人以  
今夏杖于鄉年放悲周翁而揣麾鉛鈍方縮潮綬三  
年之內能閉耻門飭廉隅不蒼黃如韶州乎能不懷  
安不疚大事批亢擣虛如韶州乎則二千石之封予  
小子寔斤斤乎其難之焉

世父龍洲翁七十序

子章讀隋地理志曰廬陵之民多壽考嘗求之莫得  
其說齡之脩短懸於彼蒼陰陽之和私一物天於  
廬陵獨厚之乎以謂山川風氣繇然原槩遼濶無崇  
山峻嶺之險為之鬲絕煩囂士論法先王無熊經烏

伸之徒教之導引鄴縣之菊武陵之桃羅浮之瑤石  
武夷之幔亭皆吾郡未設也至大聖至理之世一百  
餘年定三革隱五刃民不被兵車其敦龐淳固之氣  
使人不愁其腸慮而綿其三生則象章在在皆爾寧  
獨廬陵也然而廬陵民之壽獨異於他郡何也母論  
上世論予郭予高王父唯齋翁八十有四曾王父西  
坡翁幾七十曾王母蕭孺人八十有六王父雲塘翁  
七十有八王母曾孺人七十有二叔王父梅源翁八  
十家大人甫逾六十而世父龍洲翁以今年四月屆  
七十弟兄龐眉共隱雲亭是時再後父逾八十者三



人三碩之椒雙龍之濱南臺西泉之會墨石梧岡之  
遊歲邁佳辰五六叟共徜徉其間不手筇不肩輿即  
河渚商皓洛陽香山何以多遜焉子章從潮入覲  
覲而歸省執兕觥進靈壽杖為世父壽則深有味乎  
上志之語矣吾吉生齒繁息賦入單子其俗不得不  
儉其於聲色滋味不得不恬淡苑囿不闢臺謝不崇  
味不衆珍衣不燁熱故其民多淳樸而寡嗜好俗尚  
孝弟羞以刀錐之利傷手足之和故其民多愛父兄  
而敦禮教天之道猶酌也於此不足於彼將有餘儉  
於慾則豐於年恬淡於聲色滋味則王於神和於父

子兄弟則精動於天地蓋俗之所厚而天故厚之也  
世父事先王父母獨摯先王父母病閼鬱其中大輓  
世父始發憤讀越人倉公等書卒延二老人壽其友  
與家大人生平無一語之猶一物之藏辛酉之難兄  
弟幾於爭死其天性然也自奉甚約今猶寢處里巷  
蓬蓽湫隘翁獨怡如子章在閩吳以布褐遺則喜以  
纁幣遺則艷然曰去非吾長者素也先是恩詔老人  
有行義者予冠帶世父一服後不更着曰衣褐吾適  
也嘗語子章曰吾鄉俗樸吾家上世孝友女母雕其  
素以之奢母自養重以鬲骨肉蓋率古醇厚甘苦茹



淡為家族赤志世母劉孺人今年壽六十有七結髮四十餘年舉案相敬如賓子孫羅膝下而冢孫簞已舉曾孫二歲華封人之祝翁寔得二翁富於義不貧於德又豈徒區區長視宇宙已哉追惟曾王父母六十時構堂齊壽中罹兵燹王父母七十時命子章曰異日肯構當作世壽今世父世母又繼之廬陵信多壽考乃予家又世世壽也雖然則天之所以厚勤儉忠孝以為世勸也

督府吳小江先生壽序

代

語曰王者必世而後仁世者三十年之謂也仁者人

也以天地萬物為一體各得其所之謂也仁必於世何也朝而生夕而長可以榮庭砌之苔葩而不可以蕃磊砢之松栢修幹垂蔭喬柯飛穎則非經千霜蒙百雪不至若是故王者之仁必世而浹也而此三十年之內一手足一耳目為之乎合百執事為之乎而百執事之內人人為之乎猶之松栢託根天地非和風甘雨之濕澍皓日皎月之煦蘇輕烟慶雲之浮益亦不至若是故王者之仁又必託之仁賢而浹也不佞自嘉靖丙辰溷跡南宮至於今三十年矣中更三聖和洽八埏官無隱事國無遺利河不漏溢海不



溶波凶奴稽顙九真貢琛不可謂不仁矣而不佞當年同籍稱兄弟者今按而數之兩都列卿董董十餘人今兩越督府御史大夫吳公其一焉則所謂三十年之內與人主共易海內而仁天下者也方公始事肅皇帝職在郎署晨入事事退而嚴志沈心玄洞千古隲括六合覽物之博通物之壅礙諸自砥養其靈明稍隙出與賢士大夫講辨問學蘇援世事察得究失立是廢非以故在曹即落智去故而雲蒸風響隱然有公輔望當其時海內頌公之仁以身不以口耳及 穆皇帝時公名日高業日峻其鉅者在柄文

三楚遵說詩書摧鋤軋茁荆郢之士不然一變若人握卞玉而家紉沅蘭晉岳伯豫章會歲比士公入而擇櫪陳分駑驥蔚然稱得士文梓綠耳並登天府當是時海內頌公之仁以文不以刑名法律已事今上公由崇伐晉少司寇矣以不能於故相出撫越西故相方奪情一時臣工噤口言省侍公獨念太夫人乞身娛養忌者益啣其形已短而識者獨高其崇孝而養恬載起越西晉御史大夫總制百越公禁文武吏毋漁公家克私橐而自以身為赤志不嚶喋於苛事山菁海澨無不匿其爪牙藏其螫毒以遊于純悶



而間有犬豕入淵席澳如八寨之橫猥東山府江之  
叛卒拱揖指麾而伏竄漫滅當其時海宇崇公之德  
者謂公以孝仁天下而細卿相崇公之伐者謂公以  
武仁天下而厭姑息不佞於同籍中事公最久公亦  
時引而譚道語化於崧臺石室之上公衷實而若虛  
學殖而若貧祖孔宗孟而道于中庸歸精神於宅而  
不游二氏之樊嚴事太君而煦煦乎其孺也身都上  
公而莊莊乎其士也蓋公之自仁者如此其摯彼其  
三十年佐人主仁天下醞釀根莖寔佻於茲即今列  
卿中所稱十餘兄弟齒則鴈行爵即鵷序而崇德案

勛無不推高公不直不佞之瞠乎後耳雖然不佞敢  
畢其愚天下未仁主臣愁思焦慮求之而不能以一  
日仁故曰必世既仁矣主臣日乾夕惕若將耘之而  
不可以一日不仁故又曰君子動而世為天下道辟  
之人身神氣王營衛貫而後稱強固比松喬一日不  
周流醫書曰不仁矣夫天下亦然天下不可一日不  
仁則不可一日無仁天下之人而仁天下之人亦未  
嘗一日忘天下之仁古大臣為社稷謀危厝安繫若  
苞桑鞏若磐石靡所不至而其言曰褚小者不可以  
懷大綆短者不可以汲深君子創垂為可繼也曰必



如此可保百年無事不然戎且生心又曰今百年後  
父老思我老成謀國長慮廣思類如此公以三十年  
之勲仁天下以百年之身永天下之仁垂稱葉語傳  
後不休則在今日固咸池扶桑之明而尚羊號通之  
維也天之壽公國家之酬公不佞以仁占之矣公嘗  
對不佞謂太夫人春秋高而時以衣之厚薄枕之高  
卑產於其念不佞又得以氣占之壯土之氣御於赤  
天七百歲生赤丹赤丹生赤頰赤頰生赤金其數皆  
然以合于赤海赤海者即今閩越之南海也其數七  
故七百歲而一生公邑里宦遊適當其處而七月八  
日維公誕辰某不佞請一酌赤海之水上母太夫人  
稱千歲再酌上公兄又稱千歲於是嶺以東惠潮三  
郡守黃生某郭生某等是不佞語合二郡士民三酌  
而上又群然稱千歲

易州節判南巖族祖八十序

人道親親也親親故尊祖敬宗尊祖敬宗故收族收  
族故先長長長長而合族序以昭繆別以禮義人道  
竭矣禮之叙長長詳矣年至八十入朝則杖拜君一  
坐月告存令一子不從政其爵德與年稱者天子遣  
使者安車迎之親袒割牲所以尊禮之者如此又况



其族之子姓乎予族散處五雲西昌祖中丞樞密中丞祖墓在馬跡岡樞密祖墓在符竹諸郭乘載俱徙自符竹則符竹吾郭之根苑源泉也符竹之長者曰南巖翁予大父行起家國子節判保定易州易故燕地周武王築候臺占天之所燕昭王築黃金師事郭隗樂毅葦之處一劇郡也 明興都順天易為三輔重地園陵只尺賓客冠至紫荆西水密隣匈奴翁佐易三載催科無擾賓傳如歸虜騎不南牧邊鄙不聳人謂當展驥足處治中別駕翁一日上書內祿兩臺臣下檄留之易士昨雍道留之不可竟辭事去歸而

曳杖黃崖放棹梅陂青林翠竹相顧忘形晨風夕月邀與縱譚一切勢利都不以入其舍而每歲丞嘗僮僮祁祁陶陶遂遂春秋高不以子弟攝如懼如語如將弗見然子章官水衡計吾族食指萬人至莫辨貌名而譜不一策祠不同堂墓不合祭大愚無以和族而光先烈曾為書上翁翁曰固也在國言國在家言家茲禮鉅費鉅僎子異日家言之及予以潮守入覲還家遷西蜀展祖墓一過翁所翁讌之樞密祖墓側諸父老昆弟子姓具在會翁壽介八袞諸父老謂子章曰子以祀事來易州壽適與子期祝鯁祝饁庸



得無言子章曰黃帝之子二十五人其同姓者二人  
惟青陽與倉林同於帝故皆為姬姓餘子皆別姓見  
同德之難也德同則姓同德不同即黃帝不能同其  
子而矧其後之人吾郭肇始於姬自二虢至汾陽世  
邁種德中丞樞密南遷而德益姚迄於今益蓂蘂而  
菑畬之嗚呼德同矣同德合義義以道利利以阜姓  
姓利相更成而不遷乃能攝固保其土房易州翁官  
無秕政鄉有令聞亦青陽倉林類乎以是卜之八十  
未艾也烈祖之詩曰嗟嗟烈祖有秩斯祜綏我眉壽  
黃耇無疆而終之曰願予丞嘗湯孫之將予祖而果

願也今日之黃耇唯易州其眉壽亦唯易州諸父老  
昆弟子姓雜然進曰子言易州翁壽最之德系之烈  
祖是尊祖敬宗收族之義也親親長長人道也非易  
州也敢專承之凡我同姓自汾陽派以下嘉吾子之  
賜

廷尉王茶泉先生七十序

古者議事以制不為刑辟堯當除蚩尤有苗之刑先  
審於民故書曰皇帝清問下民有辭於苗當其時畫  
衣象服以致刑厝草纓艾鞞以全民命而海寓民萌  
亦嬉嬉于于登於壽域至華封人祝堯於天曰使聖



人富壽多生男子太和周浹淳德旁魄上下交相壽  
如此運距澆季三辟繁興嚴苦秋荼密逾凝脂申韓  
張杜之徒已無足論荀卿郭璞世號賢者肉刑濟治  
之說始於卿書李斯持其書已促秦尋以自促景純  
之言曰刑以禁刑殺以止殺生存法重犯由法輕而  
竟無以自全其軀繇是以談以法毒人者自毒也以  
法完人者自完也古今大較可睹鏡已予邑王廷尉  
茶泉先生幼秉狗齊駿聲清劬弱冠以易舉江右第  
一人與今曾中丞魯源先生先師胡憲長廬山先生  
並駮齊馳邑稱三杰起家國子擢大理廷評 肅皇

帝勅廷臣慮天下囚先生以寺副往恤雲貴二路先  
生曰 國家法司既殊奉法亦异法欲必行故主者  
守文今司寇之屬是也情有得不故理者釋滯今大  
理之屬是也氣有冤塞故恤者解網今五年一遣使  
慮刑是也而今理者恤者守主者文是春行秋令當  
雨露而雪霜也流矢影風頤有憂色刻木畫地期於  
不對物情若是吾知所以生溘貴人矣故一入竟寬  
文繫之罪緩深故之刑開棄過之目振平反之條昆  
明貴筑黃雲四出而虎穴狴扉多所明舉每活一獄  
上 上無不可其奏事竣遷寺正會 今上正位青



宮覃恩錫之 制曰遣錄南服衆望攸推使命遠將  
聲聞近徹古稱惟良庶幾無媿嗟乎此可以觀先生  
矣時方清夷先生齡壯武耐劇樊四遠引領環望需  
大拜乃决筴林巖挂冠歸白鶴與曾胡諸先生講學  
萃和集王氏子姓纂譜牒脩祠房議圭田祀二尊人  
割產膳諸姪攻古文詞類宋曾蘇而一軌於六經間  
以其隙蒔蔬龍洲投竿魚塢泲泲悞悞澹如也先生  
以明年春正月介七十子章繇粵入蜀王之諸生某  
某等介從叔乾兌來徵予言為壽予侍先生久且交  
驪長君辰有年知先生取稔而平生懿行最年者莫

如慮囚嘗取恤刑疏草讀之而知先生真廷尉也揚  
子曰昔在蚩尤爰作淫刑延于苗民夏氏不寧今滇  
貴谿洞間寔彼苗裔與中土風壤縣隔 肅皇帝不  
以屬他臣獨屬先生誠脊之矣先生平亭疑法除苛  
解燒母以鬼方哀牢是剝是剖上以成 肅皇帝有  
辭於苗之仁而身不入於蘭陵景純之刻又惡知夫  
滇人貴人之坐雞竿下者不如華封人之祝堯而更  
以其餘祝先生乎先生止長君一人常慮孫枝未蕃  
曾具辭禱於神曰一索得震再索得坎三索得艮願  
成易畫之三已難其對翼夕夢麗眉者進曰六十杖



鄉七十杖國八十杖朝數增海籌之百嗟嗟龐眉胡  
為乎夢哉先生百齡天開之矣天而有意於仁人長  
者乎則吾輩所祝願先生與先生自禱祠以求者並  
挈而共酬之如華封人云云可也

外太母蕭安人九十序

當嘉靖乙丑子章為諸生內子王母楊安人年七十  
子章前上兕觥為壽安人咲曰予年尚賒會見君脫  
跡潢汙致身青雲上聞范文正做秀才時便任天下  
此君今日事也子章敬諾已隆慶乙亥安人年八十  
子章繇閩李官入為南虞部郎便過家為安人壽是

時內子以安人春秋高不欲與予俱南安人咲曰兒  
第去予年尚賒南曹郎不五六載出綰郡符予雖老  
猶當及見之聞南曹郎晨入視公家事出而翩騎結  
社六朝舊梵三山名勝細論李杜高譚孔孟兒為郎  
持家門戶謹鑰下捷母令奴輩恣所之走衢巷也辛  
巳冬予出潮復過家為安人壽安人八十有六內子  
堅不欲之越留事安人安人促之曰兒第去予年尚  
賒太守秩滿即遷倘晝繡里中予猶得以鮑背黃耆  
之老婦遊而膳飲南海之珍羞願不侈與太守事夥  
政嚴幸善佐刀七議酒食而身衣布裙以養夫君庶



柰何以老婦故濡滯鄉園也乙酉六月安人年果滿九十而子章以二月初旬投滿牘於司大夫司大夫署其考上上令子章仍守官海上馳吏奏闕下便遣妻兒先還家如期上安人壽余讀養老禮於九十者隆摯矣飲食不違寢天子養之則日有秩令蠲其家復甲卒豈非謂難老上壽時所希覲者與其在志也廬陵多壽考予從粉巷里戚中重重見安人而安人自必之二十年之前雖被黃髮不少見鷄胡凍黎之狀暖不以人行不扶鳩語不旄荒其坐而訓子孫指揮家政無以昇盛年時則嘗意之天為之乎安人

自為之乎安人和柔婉淑婦道甚執而遇事有丈夫槩子章少賤先恭人見背安人遴里中兒奪群議以孫女女子章幣不過五兩約不論財資一見便以希文相期待其訓內子閨闈中甚具即謹戶鑰衣布裙二語非里婦口吻安人父丞南寧同母弟臨邛太守宦四方日夕安人常戒其子弗輕之宦邸及子章與其姪易州太守龍華君同舉於鄉山東觀察章華君聯袂南宮安人喜曰二子吾揚白眉而孫女夫與之遊其業日就光大可跼足湏也安人生名閥不移樊華妻於右族謹祗榛栗在楊為女士在蕭為少君身



躋上壽而康強又若魯之壽妻令母豈非自為之乎  
自為之而天聽之百年未有涯也余舅父謝青衿日  
侍北堂庶幾家不從政之義而又特翔新室以怡顏  
承驩子章不佞謹扁其室曰玆從母曰安人婦人耳  
籍令丈夫則在今日 天子必將有問焉問而就其  
室大官之八珍五齊至矣

外王母劉太孺人七十序

萬曆癸未春子章繇粵入 覲承明待計銓部 上  
不以其無狀賜勅令還守潮家大人遣人逆之姑蘇  
且詔曰孺子知女壘外王母挂帨之辰乎木難火齊

朱提文幕非其好也聞孺子日操觚作古人語輒沾  
沾喜夏四月三日齒七十隙則抒一言以祝子章唯  
唯劉氏自子政作列女傳分別六材若賢明仁智等  
篇泯泯可誦故劉世多賢婦歐陽氏自文忠公母夫  
人嫺其闈范故家多淑女太孺人歐女而嫁於劉者  
也秀負婉孌端靜有女操字外王父調絃魚躍弄杼  
鳶飛無何年重三十稱未亡人矢志劬心左支右吾  
鉅旰織屨以息其業眎翁當日倍蓰諸䟽戚屬困者  
無者沾危者案困窮數捐振之里族奔赴其廬倚為  
外窳誨二子諸孫啍啍甘白為先嘗戒曰非本非標



非微非輝壤非壤不高水非水不流敬之執子孫益  
免閔以世其家操身養志一軌於母儀夫壽者體康  
而娛於心者之為也心歎者氣餒外足者內怡榮衛  
既暢驩洽隨之太孺人壹意於所天祥順於尊章持  
一身經二物以息兒孫肖化乎賢明仁智之指而敦  
行鄭夫人之姆訓茂四德而潔百行蘭幽有香玉瑩  
無玷而且畜其大寶強其四衛以葆其天年雖古戴  
鵲之母吞玄之女弄玉之婦亦不是過而吾二舅翁  
與諸表弟承寧孺人也內不攬心外不迕色勿垂堂  
而危身勿娛緬而違大勿以陰陽險夷之爭而貽憂

是康之機娛之要也奚也貞慈儉婦道也孝而箴子  
道也周人有曰天為蓋地為軫善用道者終無盡地  
為軫天為蓋善用道者終無害天地之間有滄熱善  
用道者終不竭子以道壽母母以道自壽懿哉淵乎  
七十未有際矣子章侍母安人安人訓曰母氏有詔  
彼官萬物闡八荒者燕秦楚越憐若皮毛戚埒肺附  
郭家兒一子一婦可异眎之乎吾奉慈令日廩廩不  
敢异眎兒兒眎四竟赤子果如吾母氏言不异兒皮  
毛乎肺附乎子章跪受教蓋令家大人有少君孟光  
之助子章無子騫休徵之遭而且得專心力廣德意



於四方之蒼赤不敢為燕秦楚越之視太孺人之仁  
實弘侈焉太孺人又喜佛每戒母安人當佛現日嚴  
持律藏絕茹脂膩佛書曰地輪依水水輪依火火輪  
依風風輪依虛空虛空無所依佛體也佛體能仁也  
太孺人仁母安人母安人仁子章以及子章之蒼赤  
依報正報即以佛法推之太孺人應物之緣住世之  
數又惡可歲月計哉子章會自覲還取路過家得隨  
家大人母安人後執兕觥為太孺人壽始從家大人  
令以道祝既從母安人好又以佛祝

王母段太安人八十序

蓋不佞之為理於閩也先王父是時春秋高矣進不  
佞而庭誨之曰孺子知理道乎老子曰天地不仁以  
萬物為芻狗而易曰乾元資始坤元資生夫老氏非  
知言者仁者天地之心也一歲之運陽行而薰育幾  
何日陰行而清凜幾何日九月物成出凜下霜十月  
以還而雪始降董子曰霜加物雪加空空者着地而  
已不逮物也六合之內東南薰育之地幾何所西北  
清凜之地幾何所至七閩而絕雪至兩越而絕霜則  
并其加空者而空之故清凜之於物夏楚之於民若  
酸醎之於味也僅有而已孺子之閩母少暨陰陽以



傷天地心不佞敬諾理閩四載即亡大功緒終不敢  
斃匹夫於篋管下比出守潮家大人又申前戒曰是  
王父所云霜雪不加之郡也不佞敬諾入潮與司理  
王君抵掌譚理道術先王父語司理曰天有大陰有  
少陰在人亦然天之行陰氣也少取以成秋其餘以  
歸之空聖人之行陰氣也少取以明刑其餘亦以歸  
之空不佞躍然何哉君之說與先王父券合也司理  
曰滇故霜雪不加之鄉先人讀易晰於陰陽之旨間  
與某兄弟誦說某時方在孺未解而家安人從旁竊  
聞之某今幸理於潮家安人輒援以為訓不佞曰善

哉王安人之訓子也雋曼倩行縣錄囚徒還其母輒  
問有所平反活幾何人得報則喜咲為飲食語言不  
則不食歐母訓文忠曰吾少侍而父丙夜持燭書罪  
人輒泣曰求其生而不得則彼與我皆母憾以今觀  
王安人之訓司理眎二母何以異焉東越故事監察  
有稽囚簿臬司有刑名簿而比歲幸邁 曠典赦罪  
隸不佞循環稽之司理君出陪市者若干人閭左若  
千人奴男子若干人女子入春稿若干人潮人誦司  
理豈弟父母而惡知皆父母教也安人以年高不及  
就潮署養司理君語輒不自懌不佞時時尉之君留



家孥以養母而施母教以惠海邦安人聞之當為君  
喜加殮如雋母而君以三年之政博翟禴之貴以寵  
於慈幃如鄭國旦且莫矣明年安人壽八十司理局  
於官不得戲膝下為驩於是同寅何君梅君與陳將  
軍交徵言不佞不佞故術昔理於閩與司理今理於  
潮其學皆出祖父母而不佞家世世多壽考以是  
卜安人之日猶尚羊之維也抑聞之安人母于玉而  
女于段滇之有段猶楚諸屈景洛陽諸姬齊諸田江  
左諸王謝自唐驃信起南詔迄今為強宗而臨安判  
夫之山實思平遺跡語曰深山大澤龍蛇宅焉段生

安人安人生司理其母兒俱賢豈偶然哉詩人之祝  
願也一則曰君子萬年二則曰君子萬年而終之曰  
釐尔女士從以孫子乃知古人之所為壽在此不在  
彼

### 康母宋太安人八十序

予既捧檄而潮陽也便還豫章過家為家大人壽康  
伯子子成別駕潮陽書來趣予曰某所不即拂衣去  
俟子來共振衣金山之椒俯睇大海子為我存老母  
母兒聚匪朝伊夕耳予過鳳岡登康太安人堂納履  
恭鞫侍酒於前為安人壽安人春秋高齒八十矣予



以伯子語語安人安人曰昇日在橫序米廩孺子鴈  
行先子子今且兄孺子而弟之猶家督然出入仕處  
子其以義裁之母恣孺子意孺子未聞處道乎物動  
則萌萌而生生而長長而大大而成成乃退退乃藏  
處之經也孺子甫動萌甲拆柰何遽言處其籍口云  
云徒以老婦故老婦齒未落尚良食日含飴弄曾夜  
篝火衆諸孫婦分繭稱絲戲如也頃者天子詔諸  
明經漂除母得拘攣故局子今且往出朋心合猶譚  
理議政入而抵掌道六戚話四隱亦宛然在粉巷子  
聞謀得於胸動適於彼故心得而聽得聽得而事得

事得而功名得願子為孺子之孰謀之也子章敬諾  
辭而之潮陽又以安人語語伯子伯子曰是母志也  
非子志也予曰母志志也子志志也抑母以就子孰  
與夫屈子以信母伯子嘿然無以應已而二三僚友  
及諸屬邑令以事會郡庭予復以安人語語諸君諸  
君雜然進曰非若是也即潮亦惡能一日去別駕君  
執太安人所以旗覆十邑生靈甚渥也君督課捕賊  
其事權异他郡他郡取教庾盈討諸偷兒有竊疾者  
耳潮產鹽鐵橋孔道以縮轂之而摧其什一君執管  
鑰以來額羨而商不羸潮盜橫戈海上居城市為人



囊囊昔時飛鳥鎩翼走獸廢脚今即稍夷艾其渠未  
生得者 天子尚宵旰憂之君入潮而狗生斃野戶  
不捷田不爭畔漁不爭隈推以贍軍興軍以保軌里  
連鄉二三年來人與人相疇家與家相疇緊誰為之  
諸下邑得枕枕上治其氓而守四竟君為之屏君惡  
能一日去潮哉於是伯子聞諸君語始堅決不去潮  
之商民大悅謹舞稱百歲諸君又晉商民語之曰是  
太安人令而守贊之也商民又稱太安人百歲子章  
於是次第其語以復太安人太安人大悅為加一七  
箸伯子聞而詣予曰善哉子之為吾母壽也

劉母周太淑人七十序

方予自燕還也倣裝入越居無何三川 命下遷延  
邑屋祗供菽水姻戚合沓紛以文委筆研旁午強半  
壽語一日虞侍家大人母劉恭人側恭人曰兒勞欲  
矣文故業今又主文事何說之辭予叔太僕先生周  
淑人以今年壽七十兒自幼交驪嗣君孝庶固不得  
斬一言也子章敬諾問期恭人曰憶每歲中秋後酌  
彼兕觥其八月廿辰乎子章敬諾問周淑人夙懿恭  
人曰周本姬家苗裔在漆田為著姓其長者嚴庭誥  
御閑女憲吾所睹記若胡憲長廬山公母歐陽侍郎



橫溪公妃與今淑人皆望者周公某覓快壻得太僕  
公識者謂若晉周浚人倫之鑒焉淑人生富胄習美  
飾歸太僕公公故諸生淑人即落靚粧脩行婦道識  
者謂若桓少君鹿車之風焉太僕公既貴未子淑人  
膏沐諸媵肅肅宵征無嘆不猶嫁諸姬女無以異已  
女則吾劉之樛木也春秋丞嘗即居邑城而牖下之  
莫公宮之用僮僮祁祁無以怠日則吾劉之季女也  
始佐太僕公教孝廉結鴻生雋儒共攻舉子業酒漿  
醢醢一呼百羞孝廉舉而公即世淑人又以身為父  
師督孝廉枕心希古黼藻百行以故孝廉大有譽於

四遠躍馬疊迹朱輪累轍以繩繩太僕之業可跼足  
須者則又吾劉之孟陶母也淑人懿徽不盡是是其  
鉅者禮極中閨教裨陰訓兒司教三川三川女婦有  
貞專淑媛猶得入彤管之書霑良史之筆而矧其在  
戚屬矣子章敬諾居無何溽暑既處玄鳥且歸秋冉  
冉仲矣家別駕兄凌雲介其二子應龍應某來徵予  
言為淑人百歲祝應某者淑人子壻也予乃言曰微  
二子之言之也章故願有言雖然章即有言則惡能  
有加於母恭人言二子請問恭人言予一一以恭人  
語予者語二子二子還報別駕別駕曰善哉劉恭人



之言周淑人也父師孝廉則義方成矣蘋蘩公宮則明德馨矣葛藟樛木則福履將矣掩華敦樸則質行章矣生自名閥則徽音裕矣後容陰禮婉婉柔則有一於斯足以千載而况其兼至乎此劉子政之所樂采而杜元凱之所肅紀者也吾弟其次第書之吾將持為淑人祝焉子章敬諾

宗伯母曾孺人六十序

齊杞梁妻曰夫婦人必有所倚者也父在倚父夫在倚夫子在倚子豈不謂陰陽殊趨男女二行陰雖有美含之弗敢成哉生男如狼猶恐其尫丈夫而倚尫

也生女如鼠猶恐其虎婦人而無倚虎也不佞謂此特道平日耳脫稱未亡人黃鵠蚤寡失其故雄有子尚鷩羽翮未張方是時倚夫乎倚子乎故其植志在貞其執行在忍強無所倚如丈夫而後可以濟難以亡負於所天而其執其道眎丈夫郵難婦人脆於志窳於心易以邪開一難一手獨拍雖疾無聲二難梟弟利其訾隣里榮其色父母憐其艾百誘千劫重垢廢室梁聘高行董威禮宗不無也三難先王之教不明世婦外不耳保母傳母之訓內不目女誠女憲之文四難疾風勁幹狂流砥柱夫亡子孱乃見貞婦嗟



此誠難矣予宗食指不下萬人內政肅穆代以賢節  
著稱若今梅浯天毅弟母氏曾孺人其一馬孺人出  
龍丘曾為邑聞家年十六笄而字梅池君事尊章龔  
行婦道勤不告勞閫以內悉倚辦孺人梅池君亡內  
顧脩什一之業而息之視先人產日益拓侈孺人方  
盛年卒然謂梅池曰君未有息妾免不孳宗祧之謂  
何人且議君牽於帷牆非妾所敢承也竟市侍兒膏  
沐以羞於後室無幾何孺人舉毅人謂不妬忌則子  
孫眾多孺人有馬又無幾何梅池病革孺人泣曰君  
病病即不可諱妾從君乎從孺子乎梅池曰子無愛

於死無所愛於我孰與愛其死以愛孺子之為愛也  
大也孺人敬諾積心愁慮拮据辛厓以佐毅學晝考  
夜徹無姑與息稍長詔出就外傳弱冠補博士弟子  
員今方富於年乘螭駕虬以須扶榼人謂路設出於  
土鼓篆籀生於鳥跡孺人似焉孺人以今年正月壽  
六十矣會不佞出守潮陽過家為家大人壽已登孺  
人堂斟兕觥為孺人壽首歌樛木宗老曰奚也不佞  
曰孺人壯齡開媵門為宗祏重是毅所繇植也次歌  
栢舟宗老曰奚也不佞曰端操有璇幽閑有容斤斤  
三十年臨薄冰以待白日即共姜奚以讓焉終歌闋



官宗老曰矣也不佞曰昔為令妻今為壽母既多受  
社黃髮兒齒是子姓所祝曼壽也禮竣不佞次序為  
說而因有感杞婦之三倚孺人若無所倚世婦之四  
難孺人若無所難蓋吾吉之陶嬰吾郭之桓發足明  
風烈而昭彤管矣孺人進穀而語之曰寡婦之子非  
有見焉不與為友意者孺子今可倚乎不然而何以  
辱大夫姪一言為老婦重也不佞聞之曰女知莫如  
婦曾孺人之為吾家婦智矣夫既壽其身且昭其子

樂山吳長公七十序

吾郡曾公之為海陽也茂德所綏每察擇長年處逸

徠勞不倦當此之勤大抵體乎余不佞得交海陽士  
甚廣聞有吳長公前郡大夫舒公以賓禮禮之矣曾  
公則以懷民為一革務得人宣明教化如吳三老等  
不再延擇何以風謠俗復以賓禮禮之及化條行察  
擇方正有護者為約鄉佐推擇吳長公復以伯落長  
之禮禮之無何直指蔡公行縣察擇耆行最高者八  
人人給絹一疋首給吳三老學林稱直指君暨郡邑  
大夫之推舉四面風德是謂軼迹吳長公應命為知  
者者是謂持起以布衣柔履之士受上人知見器重  
焉由是邑之士民莫不閔免如家至而日見之明盛



治之所隆也海陽士對余稱吳長公孝父甚篤內外  
脩飾弟吳次公早世一子從文方在髫髻中長公欲遂  
其功名令與子從章俱學既而為郡文學員都試首  
名里人謂長公遂之有名也賈於吳閩樹價通都出  
言以副情發號以順時諸賈人為之不二價者數十  
年人稱長公有韓伯休之風烈焉以父先逝遂謝賈  
事家居奉母日嚴不離左右凡廿年外母無子事外  
母如母卒之日載衣被棺木下至飯含之物畢樂務  
振施人之窮乏時過無宿麥則出囊中錢貸之多此  
類數為郡邑大夫所推擇然不以見推擇為高蓋

損退闔門養性不治榮名以違俗則危殆以依世則  
滿調不早不亢是吾師也生平躬服節儉至晚年綿  
衣不絛草鞋不穿土事不文木事不鏤惟宗信義以  
訓迪里俗若吳長公謂之謹厚長者之行與非也今  
年八月廿四日長公春秋七十之辰其子婿王大元  
方爨曹願中外孫王道輝介吳君瑞穀走書燕中屬  
余不佞之言以壽瑞穀則向稱長公於余者又稱長  
公之子太學從章從子文學從文為世其家文雅質  
行里所推重今余之言不亦有徵哉而壻則曰外父  
視兀等子視之也外孫則曰輝幼失怙撫於外家外



大父視輝孫視之也惟惠之揚於之言以稱觴為少  
報塞萬分焉蓋人情恩深者其義謹愛至者其求詳  
夫戚而不見殊孰能無嘆今聞長公為內外所誦祝  
則舅壽期願可右契侯也世人諒不足而談有餘者  
比比然聞長公為人言若不出口容若不勝衣而質  
行朗徹為上人所周知內外所誦祝若此詎單為邑  
三老今 國家輶輪徵請得若而人其長厚之風潛  
助於治化靜靡談而敦實行所裨益豈不大哉余不  
佞為此言時曾大夫以入 覲亦在燕中遂正於大  
夫亦以孔子有言為政者莫大乎使民富且壽也而  
交致之焉終

續衣生粵草卷之四

泰和郭子章相奎甫著

記

六虛堂記

夫道一生二二生三兼三才而兩之故六伏羲氏則  
而畫之曰六畫分陰分陽用柔用剛曰六位道有變  
動曰六爻擬諸形象曰六龍吾夫子以其不可典要  
曰六虛揔之非六也三才之道也無聲臭無名象虛  
也而未始虛也富有而大日新而盛實也而未始實



也實而虛虛而實是乃所謂道也天之蒼蒼參寥無  
上玄冥無下盎然虛者非邪而孰為之盎然邪地之  
溟溟注焉不滿酌焉不竭曠然虛者非邪而孰為之  
曠然邪人之惺惺喜怒哀樂之未發忿懣好樂憂患  
之未有所湛然虛者非邪而孰為之湛然邪就其盎  
然曠然湛然者名之不可謂非虛就其所以為盎然  
曠然湛然者名之不可謂虛老者曰天地之間其猶  
橐籥乎虛而不屈此老氏之虛也而歸之無無佛者  
曰離者無身微者無心執身為身者則有身礙執心  
為心者則有心礙此佛氏之虛也而歸之空空詞章

之儒經籍深富辭理遐巨渙如江海鬱若崑鄧自謂  
濫侈葛天推三成萬實其腹以今古而竟流於淫詖  
刑名之家儲說倒言八觀五輔薄仁義羨富強盡思  
慮揣得失挈前言而責後功自謂其實利便於人國  
而竟流於慘刻是四人者虛者虛矣而惡知所以虛  
實者實矣而惡知所以實吾所謂虛此六者也陰與  
陽柔與剛仁與義也不有六則無以受一不有一則  
無以成六故曰六爻之動三極之道也天下之動貞  
夫一者也此虛虛實實之說也顏子仰鑽瞻忽幾逃  
老佛之舍而夫子以禮文實之見徹卓爾子貢貨殖



猶然多學多能之見至於千億屢中中克也滿也已  
墮於世儒之塹而夫子以顏之屢空惕之空虛也故  
顏之學始於如愚終於若虛而非賜所敢望吾師趙  
澂陽先生起東浙慨然以斯道自任子章弱冠受學  
於燕先生嘗告子章曰人之一心無時不用亦無時  
不止如太虛之體流行於旦夕瞬息間而未嘗有也  
又曰幾者動之微先道之終後天之始也辨之而早  
不離乎天失之不察遂向乎人流行而無有者虛也  
幾者一而實也蓋宛然聖門虛實之旨先生在詞垣  
以不得於時相出臬東粵已拂衣歸金華天啟斯文

付之六洞虛明玲瓏盤紆豁徹舊三洞名白雲紫霞  
湧雪僧埋其三未有名至是悉屬先生先生誅茅結  
廬其間顏其堂曰六虛會 詔召先生入備顧問而  
子章侍堂中先生顧謂子章記之嗟乎宇宙大矣所  
謂虛者豈第六洞自六而百千萬億北京正載何適  
非虛而要其實則一也故曰吾道一以貫之五達道  
三達德之行一也生知學知困知之知一也安行利  
行勉行之成功一也為天下國家之九經一也佛老  
空無其萬而并空無其一故間鬲於五際而室施於  
八埏辭章刑名之儒綢繆其萬而名聞其一故翺翔



於蓬蒿而絕望於蒼溟此聖人之所以為大也虛而為盈難乎有恒故虛貴盈也山上有澤虛以受人故虛貴受也不盈不受是曰不實而何虛之貴為雖有千雉之城士民不備薪食不給方楯鐵錡不稱則守俾者泣雖有萬斛之舟櫓楫不利綃繹不長旌旗帆帷不設則御風者疑此亦虛而不實者之過也昔者周元公之言曰無極而太極無極二言始於老子安得曲為元公諱碩元公意曰無極非虛無也而太極故能生陰生陽以生萬物故又曰無極之真二五之精妙合而疑曰真曰精曰疑此吾儒之實非老氏之

虛也當時門人未能深惟其旨闡明其說而徒以滋建安鷺湖之紛員先生以六虛名堂豈無一而實者為之貫乎而令異日登斯堂者疑於先生之旨若後之紛員於元公吾黨與有責焉子章不佞請得以虛虛實實之說明之至於巖洞丘壑之奇戶牖綽楔之義今曩通塞之繇詳在同門汝南王太史胤昌記中不具論

願豐亭記

水一也三代而上不以隄隄之亦治三代而下不以隄隄之不治則曷以故焉時也繇迷於時而息石於



鴻水汎濫之日故績用弗成而決排鑿辟待於禹興  
賈讓迷於時而欲施禹績於鴻嘉之秋徙民決隄猥  
云上策亦竟托諸空言時乎時乎其微乎不佞反覆  
惟之時者天也天者人也三代人徒龜少疋夫百畝  
田足於人捐其卑濕以予水不與競尺寸之地何所  
事隄吳楚秦漢而後生齒既蕃聚落日侈田不益剛  
民萌穰穰勢不得不疆理其卑濕為田以澹人而又  
不得不隄防其犇湍以衛田嗟乎此後世之隄所以  
日崇也猶之井田封建秦以來不得不阡陌之郡國  
之也 明興隄防之繁莫甚於今高寶維揚達於徐

沛遙隄縷隄老隄新隄隄之上有亭自鰲極以下不  
可名數此其隄與亭之鉅者 國家受漕利而坐享  
百萬艘以訾軍興其明効可睹已我潮蕞爾辟在東  
嶺沿河治隄自宋迄今長岐城北南桂登隆東津秋  
溪上莆下莆在在而隄郡以上崇岡復嶺田多在嶺  
逕河壩河水自大埔程鄉三河而下如建屋甃執直  
射田郡以下百里外南臨禪海海水潮汐寢灌雄風  
捲浪鹹水湧汗厥田不秋遂成烏鹵故內隄防河以  
亡受其迅流之射外隄防海以拒其鹹流之入潮之  
隄如戶樞榱如身羶裘榱不下則盜入之裘不重則



寒侵之隄不厚則水齧之其可以死一也萬曆十一年夏惠陽大水漂自長樂濫於海陽兩河隄畔崩塌潰決不佞秋以試事入省冬以覲入燕未及築砌而去同知何君署郡篆日惟隄是棘相其陰陽觀其流泉乃自負薪塞其隙竇令下甫旬百姓靡趨起竹篙至漉溪共長若干丈濶若干丈衛隄以內田共若干畝不樊官帑崔然石菑公乃築廟其上以祠水神築亭廟傍名曰願豐意以隄固則水不盜浸水不盜浸則田不殫為河田不殫為河則民得稻黍芡牧其中而樂其室家嗟呼公之所以為潮民摯矣明年夏

水自惠來如故而潮無逢其災害兩岍堅隄垂垂如長虹南東畝其或殘冬公病漏枕枕上二月餘潮民扶老幼襍然禱諸城隍曰公壽吾潮奈何以吾潮死公公僿渠之漏止泛溢不愁吾民吾民聽公病漏不一救藥無德不售矧是父母已而巫者醫者僉曰公亡恙民大說又明年春公病瘳不佞衆公及別駕梅君節推王君守備將軍陳君泛舟韓江登隄亭酌兕觥為公壽酒酣公起賦甫田不佞賦大田公謝不敏不佞曰是役也太守事也公代守以福潮民而守代潮民以祝公釋詩者曰曾孫以我田既臧報農夫以



介福農夫祝魯孫享祀以介景福上下之情所以相  
賴相報者如此匪隣之水曷以昭公明德匪公病曷  
以見匹夫匹婦之情嗚呼非盛德其孰能當之公名  
敢復鬱林州人以司馬郎謫治潮其豐吾民甚夥隄  
其大者故不佞為公大書以紀諸河之壅

重建漢壽亭侯祠碑記

世傳漢壽亭侯關雲長當戰陣中手左氏春秋不釋  
夫春與秋天也天道大數相反之物也不得俱出春  
出陽入陰秋入陰出陽故常一而不滅一而不二者  
天之行也春秋之法以人隨君以君隨天故曰天無

二日民無二君侯之言曰日在天之中心在人之中  
心在人之中忠也持二忠者為患患人之忠不一者  
也故不一者患所從生日二視則盲耳二聽則聾左  
手畫方右手畫圓莫能成人况一心事二君者乎侯  
學春秋一心於劉氏其旨微矣東漢日落當時與侯  
相周旋者三人玄德中山裔故兄焉後臣曹氏弒后  
王魏去洛遷許僭加九錫孫氏席父兄据江東因而  
自王萬世而下誰不知右孫左曹而侯獨不然廬其  
廬食其食報效而後去赤壁之戰老瞞氣奪華容相  
遭不發一鏃么麼仲謀若乳臭兒講昏不可索荊州



不可侯豈賢世之姦姦世之賢者哉侯自負重矣侯惡知玄德惡知曹孫知漢而已臣玄德非臣玄德也臣漢也曹生侯并貸玄德妻孥非生侯也生漢也荆漢土孫氏以為堅策土而自張官置吏侯以為奪漢也故怒權而予操而權卒奪荆而襲侯非襲侯也襲漢也權於是重得罪天下後世而操輕矣朱子曰人皆知操為漢賊不知權真漢賊孔明先主正做得好時又為其壞了豈非謂麥城之役乎春秋傳曰重為輕輕為重濟桓之立弗受之先君刃弟子糾罪亦重矣然而知三酌管仲以自覆蓋不背要盟以自湔浣

春秋予之此重而輕者趙宣子世大夫也穿弑靈公宣子亡不出竟返不討賊春秋誅其忘晉書曰趙盾弑君此輕而重者春秋予桓侯予操春秋誅盾侯拒權其法一也嗟乎侯於春秋深矣潮故有侯祠在衛東角湫隘喧溷南海陳將軍經翰守備潮州謁侯祠嘆曰噫非所以肅明威而薦抱蜀也卜地於衛左長若干丈橫若干丈飭材鳩工經始於某年某月某日巳事於某年某月日中為祠祀侯左右為兩翼前為池梁其上以通於門會不佞自 覲還將軍屬記不佞并請題其廟題曰漢壽亭侯祠一切武安壯繆等



號捐不書嗚呼繫侯於漢庶幾明侯之心而母鑿於春秋之旨者與

程鄉縣凌風樓記

子章讀文信國公集宋氏之季公提勤王師出入江閩往來梅州後繫燕獄追往憶故至集杜句眎梅州不無并州之慨焉其言曰予至汀汀兵非素所拊循寇兵自贛自劍交予引兵趨漳謀入衛漳潮道阻乃入梅州時麾下頑不循法斬二都統軍政一新而系之以詩樓角交風迥孤城隱霧深萬事隨轉燭秋光近青岑嗟乎公於梅何卷卷也公自麗虜難毀家從

戎及至梅母子兄弟始相見時弟壁知惠州母夫人遊二子間處之怡愉公自梅復潮趨潮陽以及五坡嶺之旣始浮南海嘆零丁說皇恐以成仁于柴市而公為趙氏之念至是始畢則所以成公忠孝大節梅與潮也公得無意於吾潮乎沁園春詞沛塞蒼溟至今留鎮東山而梅州廿言即郡縣志脫畧不書何也萬曆癸未余繇覲還越入羅浮聞程鄉諸鍾賊亂趨榜人絕龍川至則觀察鄭公業已討賊剪逆扶傷砥死拊輯黎甿昨招徠脅從予與司理王君國賓及錢丞毅受鄭公方畧布嶺之東四遠日縛其未盡殲者



繹至月餘程大牧定因念公所云梅州都統頑不循法以今觀之豈其習俗倡亂後昔以然耶形家又言城南門抱負少訛門外河流湍悍失其故道是用梯亂予登之悵然因摘公詩樓角凌風迥之句顏之曰凌風樓嗟乎退之守潮而潮趨文周元公提刑入潮而潮知學豈必易民而後化哉顧子瞻一記韓祠逾光元晦拙窩數語周賦始顯公駐梅日久其忠義之氣豈亡過化於此鄉者莫為之後如子瞻元晦令過抑不白志乘莫載予故刻公梅州篇於石以配潮陽東山之詞而借凌風二字貽之樓角俾程鄉民萌過

此樓者得亡迴心滌慮激忠赴義湔被其所為不即於二都統與諸鍾之淫而求亡負於公如潮人之向文學日鑄陶於韓公元公者邪夫風汜也其氣博汎而動物也細則細夏則夏颯颯而泱泱則颯颯而泱泱莫得而違也公靈爽凌厲風雲予以公之風風程人辟之明庶逐寒而閭闔排暑也瞬息周八極豈第四竟昔予視摧真州於公度江處葺大忠祠今來守潮上書督學大夫請公及同死義者入祀名宦而况梅州又公生所注屬之鄉假公片語以褫庸回而奪之魄挽澆薄而趨之醇或者其在此樓乎毋令程義



化獨專美故乘可也

重脩養賢堂記

昔者孔子之言曰君子固窮小人窮斯濫矣孟子亦曰士能亡恒產有恒心民則不能此特為上智下愚設耳士君子而下民小人而上智可令愚愚可令智是曰中人天下惟中人為衆窮則小人泰則君子多賴則士亡所賴則民先王知其衆不可以力勝故制行不以已而以中人為制令亡迫於窮苦以亡失為士君子故其制祿自庶人在官者得代耕上至士大夫卿迺遷迺隆凡此皆以養庶恥而遠於竒衰消其

養生喪死之憾而成其為社稷廟廊之器其長恤人才之意如此 國家設官頒祿眎前代寔薄而郡邑之士廩於學庠庶幾類官米廩之遺邑士半於郡制二十人 高皇帝意若曰之二十八者幸為士君子履約而裕智慮益粹白不幸而民小人吾恤其饑寒久彼將有所訾而不大獷噬吁嗟乎愛士摯矣泰和在廬陵稱忠義文獻區二百餘年縣廩射策取高第比比可數蔚為碩儒顯為名卿故會食亡所嘉靖間邑王侯躬尊經閣出餘植建廩堂當時會稽其事屬族世父元暢予髫時猶及聞之歲父堂圯隆慶間邑



其侯葺而斥之中為堂顏曰養賢左右為二楹前為門後為講舍共橫若干丈長若干丈丁卯予從諸君後講業其中已已奉 恩詔入國學堂尋圮萬曆壬午邑尹侯來治西昌度貞廢舉留意絃誦捐俸出餒伐材重構鼎于故域覩于舊制而屬其事二尹陳侯又不欲泯前侯意仍厥堂名而屬其記子某子某謝不敏諸君以昔共講業故婁趨之子章曰予讀孔子序易卦其言養者二曰物穉不可不養故受之以需物畜然後有養故受之以頤穉也者微也辭曰蒙以養正畜也者大也辭曰聖人養賢我是以知其正也

乃所以賢其穉也乃所以畜而其需也乃所以由頤與頤之權在君而需之實在我故又曰頤者養也需者飲食之道也此道不明不行世蠹知味士立橫序中糟粕詞賦沉酣制科其託而逃焉者掇拾浮屠醉夢玄牝一得志三人者貪饕聲利埒如也夫子樂疏食水飲曲肱浮雲富貴豈徒自傷所遭不幸為萬世示飲食正理需道也伯魚顏子之坊在攝相後官日又仕日撫亡能厚二子塋則疏水曲肱聖人樂之終身焉耳今士大夫蓬累而行猶閔免自好得時則駕朱軒駟馬相望道涂璇房綺室貯以靡曼而猶曰吾



標為之其將誰欺乎此於飲食之道自相叛戾即業  
食太官鼯鼠耳其誰曰賢天地不為宇內私一物故  
能養萬物賢者不為吾身私一物故能養萬民故曰  
願貞吉養正則吉也此需頤之旨也漢人之諺曰何  
以孝弟為財多而光榮何以禮義為史書而仕宦嗟  
乎其弊豈直漢哉子某先諸君而出尸素吳越徂恩  
十有三年惴惴焉戴不肖之容以附於賢士大夫之  
林重為吾邑忠義文獻之玷故推廣養賢之說在先  
自養正與諸君子交淬礪焉

平遠縣開新河記

平遠非故邑也而邑於茲且二十年所逼於盜夷其  
窟以為國也昔也圯地今也家邑邑依民民依食夫  
民上不屬天而下不著地以腸胃為根死不食則不  
能活五穀鹽筴民之司命也蓄賈游市民之通施也  
而平邑詘焉水絕壤斷舟輿為梗不得曰衢國地十  
分山得其七而田重重者三又率再易不得曰饒野  
東距南海鬲於羅浮西距澄海阻以程江去煇沛者  
二千餘里不得曰海王夫為國者不通於輕重不可  
為籠以守民不能調通民利不可以語制為大治故  
今為平計亡若執其通施以御其司命而通施之執



在水陸二衢陸則民苦於任擔而罷於林麓一夫之力重足共朝夕水則民逸於舟楫而力紓於澗汜一舟之載足以供十人故使吾民為登降之萌也孰與使為道澤之萌也此平邑新河之議所由起也予壬午春入潮時照磨廖汝栢署邑事以父老議聞予甚憐之民方剝耜耒趨芸壅不給秋予入 覲郡丞何君敢復司理王君國賓覆議上之觀察鄭公公報曰可出醵金倡之平民子來雲集廖以憂去今令黃君郁桂來督典史張廷章日夕開批徹壅通堙遂竟厥工河起東門青雲橋至石窟會濂子渡入三河凡二

萬三千一百餘丈鑿湍峰梗險凡三巨石開烏戰眼紫葛藤石頭橫石楊仙楊船合溪七里犂壁沙石凡十灘逆地防挑浚土石凡七千六百六十七工會費勞匠募民凡二百三十餘金經始於萬曆十一年春正月巳事於明年三月凡四百四十六日觀察公復令造官舫四置守者二以代郵遞守道韓公行縣復命鑿大峯劍門二灘以夷水道平民爭以輕舫試新河水溜石坻沙漂壑激往來如織一切貨賄俱從舟載虔汀商賈絡繹湊合平城不路而民雍於衢不海而鹽溢於釜不野而穀周於廩壘嶂深箐莫礙舟楫



恒風淫雨市不翔踊民力逸而國用饒則河之為利  
博也河既濟予適從 覲還黃令來謁以工成告且  
徵言以紀其事予讀河渠書李冰守蜀鑿離堆穿二  
江渠皆可行舟百姓饗其利西門豹為鄴令鑿十二  
渠民少煩苦不欲豹曰百歲後期令父老子弟思我  
水之為國利其較著矣平所足者山所不足者在田  
與海是渠就則山之利如礦鐵薪蒸得從渠出他國  
田海之利如米粟魚鹽得從渠人以羨易無以逸代  
勞平即界萬山中通財交殷猶樂園也且平之民昔  
時斬木揭竿甘為盜者又惡知非以米鹽不通施無

以延其司命而掠之他竟乎故是役也不獨通商  
引灌溉而并以塞盜源此其所急於民者猶在蜀  
鄴上其不佞會 覲去無能執役坐享事成則無愛  
一語以書藩臬二公之伐昭郡邑諸君之勤勞父老  
子弟之辛苦而又以告後之吏民時時沒之俾勿墮  
嗟乎此亦賢者之法式不可更也

海豐縣新開楊桃嶺路記

越嶺東之多盜也豈獨其民獷悍哉蓋亦山川若為  
蔽焉蔽垢內穢者地也湔拔其垢穢而疏壅之者人  
也彼地即辟逖設為官司治之設為城廓衛之設為



市巷門渠通之設為野涂以達其道路蹈也路露也蹈且露即野之橫行徑踰者禁而山川無能為蔽鼠社狐城鹿蹊馬跡足脛車轂緣踵而踏之故道路之設豈第便往來所以破山川之蔽而攻姦宄之竇也周官司險周知山林川澤之阻設國之五溝五涂而樹之林以為阻國有故則藩塞阻路而止行者以其屬守之惟有節者達之先王之意微矣趙佗將自王語其下曰盜兵且至急絕道聚兵自守漢擊呂嘉先開道於牂牁越雋曰此制南越一奇也故越盜多好徑負道之險而制越盜者莫急於開道以夷其險

海豐越劇邑而當惠潮之湊盜寇潮潮急之則走豐之西合惠黨以拒潮他日寇惠惠急之又走而之豐之東以合潮黨而拒惠若楊桃嶺一帶故逋逃藪也嶺故有路下達惠廣上徹潮漳亦豐之劇旁乎鑿於漢塞於孫吳通於晉明帝之六年而自六朝以及唐宋元大盜據為堅窟 明興政教旁羅訖于海隅景泰間運司砌驛路大蹊亭礎猶存蹊與嶺連通通塞正德間邑令楊君繼榮始甃楊桃嘉靖末盜起復塞行人從間道繇新嶺康坑南山抵觀音堂絕江日莫苦亡舟楫露宿壘次盜遇而收之如委饑虎今



天子神武芟夷群盜豐民始復循陟故道頽狹者蝸  
角迴者羊腸岨壘者竈突峭急者鋸齒或起或伏者  
雲騰而波湧山柵截業中洞外逼左不得以右右不  
得以左俯瞰翠微如身歷紫虛令人亡不目眩舌橋  
而卻前步良亦險矣已郡丞廖君憲邑令王君惟翰  
後先增葺稍去其甚萬曆壬午姑蘇黃公時雨繇比  
部郎出守惠州期年政平化通下令除道而豐父老  
以楊嶺道梗狀聞黃公乃捐適金檄別駕木君某董  
其役未竣而予同年陳君汝鳳來令是邑批巖突砥  
逆拆伐石築土程日覈工盤紆二十餘里列樹置亭

五達六達比于康莊陳君謂是役也不可無紀而屬  
言子章在易有之伏戎於莽升其高陵三歲不興解  
之者曰安行也楊桃為戎伏自漢晉到今矣刈其榛  
莽排為方軌高陵既升戎將焉興此最得周官司險  
之意而展車馬通商賄其區區者先王之教曰司空  
視塗司寇詰姦夫塗之視也而亡不姦之詰也五嶺  
自惠潮曰愍國惠潮目豐曰逋藪茲路之闢豈直幸  
惠唇厚齒固指完臂健所以幸吾潮者侈也陳君柔  
惠鎮定子章故兄事之茲守潮幸與之俱又幸與黃  
公俱而黃公有直質而無沈心恒示我周行子章亦



婉以從令，和安而好敬。昔東海徐吾借燭，隣婦夜與合績。子章不佞，無能為公禋，而以隣故，坐受事成。則亦時時為公徐吾處，下去後一埽陳席焉。

浣溪五祠祭田記

古者天子籍田千畝，以供上帝之粢盛，所以先百姓而致孝敬也。下而卿大夫有圭田，以祀其先，惟士無不則，亦不祭。故祭田者，自天子至庶人，一也。吾宗自唐中丞祖以來，食指幾萬人，州處萬安，泰和之壑，相距四十里，每小宗有祠，祠有田，以共鷓亭，具薌蕕，徼田靈於先人，毋敢後時不舉。若浣溪五祠祭田，今叔

喜始益拓之。五祠者，何祀始祖，興宗分祖，季實高祖，定軒曾祖，傳巖祖，大川也。五祠之子孫夥矣，何喜以一人田喜，儒且貧矣，何能以一人田嗟乎！此喜所以為孝也。喜父崇，簡性傲儻，高譚濶武，急人甌，難解其紛糾，不契契，什一之業，家用旁落，母張孺人，少宗伯衡姪女也，申禮靜志，課子詩書，喜由是勩力於學，丙夜不休，歇頤牛衣，蝸廬亡以佐饗，膳出為鄉塾師，籍菽藜怡二尊，人年廿九，又為文江人師，父塲哭痛殮，塲一繩於家禮服，竟始以母命娶李氏，亡幾何，李塲喜年三十七矣，自以母耄且嫠，婦死亡，依不忍其塊。



處也辭文江弟子又為鄉塾師母子响响明不離八年所而母又物喜合葬母於父遷妻李附焉服竟乃曰老母在喜身不敢遠遊今得脫然馳四方矣遂之潯陽為潯陽人師五年來歸曰吾年五十有五不幸罹痿疾非淳華莫起吾已矣恐去墳墓填他鄉溝壑又為鄉塾師會稽前後所得贄儀共六十金或曰君未耄貯而息之與時轉貨可高訾喜曰吾勿貫市或曰君未有息營數畝將自老焉喜曰吾力弗任耕天譴不孝靡似靡續异日者夏初秋嘗將屬之誰乃捐金市田若干畝助五祠祭立父母主於席側族人

憐而允之喜曰未也族憐而允我者寧石人乎聞之郡縣聞之直指邵公公異而旌其孝今邑侯王公復上之觀察公批鐫碑於祠以求孝思喜曰未也石不可泐乎吾聞之不朽者德其次莫如言文獻不足夏殷亡徵吾將句言有道勒之貞珉是先人無祭而有祭喜無子而有子也於是族伯博士脩業先生為具仁孝永念疏聞之家大人命子章記之嗟哉先王孝敬之教不明於世士大夫愛存慈著之忱不展於宗公賓朋殷勤高會倡樂挾膳提醪不辭千金而經祠世室窮年不得一商脰之饗其貧而無賴者



斬丘木鬻祭器市祀田以衣食其身而燕越其祖叔  
喜愛父母而豐廟享籍祖宗以存親禊其為謀動且  
摯矣語曰庶人孝則澤林茂浮珍舒草水出神魚而  
喜至痿其體弗克舉子奚也彼所以為子者大也羊  
舌之鬼餒矣而叔向之賢存中郎之女胡矣而華顛  
之文存道生佛生之既慘矣而信國之烈存所存存  
即子也而况喜以孝存乎夫孝也者施之後世無朝  
夕者也

惠州府教場振武堂記

夫兩軍相壘人各懷鬪心士競含生氣而卒有一敗

敗於其所不便而死於其所不習夫其所以不便且  
習者豈獨其卒之咎咎坐於將卒者之教疎也故曰  
以不教民戰是謂棄之伏鷄搏狸乳犬犯虎夫何幸  
之有 國家兵制二百年来盖三變云始郡國制衛  
所領以百夫長千夫長統於萬夫長其弊也統絀弱  
將旄倪充伍一變為民兵廩於里甲隸之有司其弊  
也比有斯輿駢足郵遞闇於干楯無補城堦再變為  
召募半四方亡命者郊壘多壘稍籍其勁悍其弊也  
恃力驕主馮衆脫巾往者辱鎮臣於錢唐挾總帥於  
西川朋徭賊於東山其無賴於國何以異間左民兵



而說者胥咎其將之無教深哉乎其言之也 國初郡郊各設教場以訓戍卒比者召募成行主將往往即其所簡練之惠州故有場在西郊亭堂蕪塌帷幄風雨萬曆甲申叅戎洪將軍至謀於郡守黃公曰古者四民雜處則其言唯其事易矧在五兵兵之設也春蒐振旅秋獮治兵同居同游同樂同和故夜戰足以不乖晝戰足以相識今教有場矣而臺壘不設目耳不一非以成威神而肅斧鉞也黃公謀之郡丞鄭公別駕馬公司理孫公僉躓其議上之巡道鄭公守道韓公報曰可乃朋心協訾庀工鳩材築臺中廣若

千尺長若干尺臺前建若干楹中為堂顏曰振武左右為兩翅前設二壘以崇牙旗喧鼓角臺後為後堂經始於某年某月已事於某年某月會子章以考績入會城道惠陽二公出郊祖餞謂余一言紀之余惟教者訓練之謂也振者奮揚之謂也今之教且振者不過曰旌旗幡麾之節金鼓笳笛之聲縵綸籠轂之飾率然招搖前却左右之應如斯而已居亡事威目威耳廩不可犯猝有急坐漏舟中伏燒屋下耳安所得勝兵而用之聞之司馬法一人學戰教成十人十人學戰教成百人百人學戰教成千人千人學戰教



成萬人萬人學戰教成三軍每變皆習乃授其兵今  
所為一人者誰乎鷲鳥將擊卑飛歛翼猛獸將搏弭  
耳俯伏微哉微哉勝在不可知今將而知微者誰乎  
蓋其學也乃所以為教未有不學而能教也者其微  
也乃所以為振未有不微而能振也者此大將事也  
洪將軍起家儒生魁武闡予嘗得其試策讀之說詩  
書敦禮樂蓋庶幾學而知微者頃者程鄉之訐醜類  
悉殲渠率未獲守道楊公以義激將軍將軍軫輔車  
之急授計左右蹠萬山中折其首以獻 天子潮惠  
千里草檉再救將軍之教庸而武振類如此召募即

悍亦惡敢恃力衆以傲將軍异日者臨大敵剪鉅寇  
吾知惠陽一路皆便且習者吾潮亦永籍蕃蔽哉是  
時黃公方建文昌祠以州處諸生而復相將軍建振  
武亭以端治五兵蓋合文翁龔少卿治蜀潁川兩施  
之惠陽可不謂總文武兼剛柔者哉黃公名時兩姑  
蘇人鄭公名天佐閩人馬公名伋孫公名鳴教俱楚  
人洪將軍名夢鯉亦閩人

北海祠祭田記

記曰圭田無征孟子曰卿以下必有圭田圭田五十  
畝而又曰惟士無田則亦不祭王制亦言大夫士宗



廟之祭有田則祭無田則薦則知圭田賜也士無圭田者亦多矣而一廟二廟一壇之制適士官師得祭於廟霜露既降雨露既濡悽愴怵惕之心得饗於親春禴秋嘗夏禘冬烝時必不可疏而脩宮室設墻屋備百物非田莫與辦此近時士大夫家祭田之議所繇起也猶圭田之遺也余郭游溪為邑著姓自二節婦以來至封大理君始著大理四子長福州衛知事仁次進士按察司副使仕知事子鵬以援例授益藩引禮舍人引禮子堯臣繇邑庠生授京衛經歷京衛子子聰繇邑庠生授都司經歷嘗捐腴田入忠孝堂


為義田以訾封大理君支裔具載曾中丞魯源先生記中經歷為諸生時與予同橫序其為人急大義而親親守天之聚而施於宜當京衛存日專建祠祀引禮題曰北海祠北海者引禮君號也京衛易簣長安舍中絕口家事遺勅經歷撥田贍北海祠祭以其餘課北海支孫經歷捧讀感泣恐劫先志益推廓而增大之捐泰和信豐二邑田若干畝供春秋祭若干畝給泰豐賦若干畝贍塾師束脩款約中首舉是三者次昏取殯塋次疾痛醫藥次丘壟封築次酒漿毛牲次減獲衣食詳不苛樊簡于疏濶儉不啻固費不恣



太籍令北海而在為子孫之畫無以易此孝執經歷  
承考幹父而昭祖烈即匪圭田之賜世世萬子孫食  
之矣經歷復慮後死者闇於敬宗收族之義而越越  
焉刀圭尋尺是競特屬于記之石子嘗讀南山矣疆  
場翼翼黍稷或或與我尸賓壽考萬年又嘗誦大田  
矣曾孫來止以其婦子饁彼南畝田畯至喜以享以  
祀以介景福夫曾孫之大田與南山之田未必即古  
者圭田而一以畀尸一以享祀則知受釐者祭成祭  
者田古賢聖莫之違已士大夫家無幸而貧官環一  
畝享重二簋犧牲玉帛不脩采服彝器不蠲次主屏

攝不位逞逞匱於祀而不知其福北海之祀田啲啲  
疑疑子孫世衰蘆則世烝嘗世烝嘗則世壽考景福  
如南山大田云云皆烝祀之嘏所必致者脫或詣窳  
而荒蕪恣雅而割分倚富而吞并厭貧而粥市甚之  
斬丘木衣祭服市祭器請墓地皆宗廟之蠹而鬼神  
所必翫者經歷君得無焦慮而深惟乎予不佞敢以  
規為瑱而日寘之嗣北海者之耳也無忘經歷之款  
約也





皇  
直  
先  
之  
四  
詩

五  
四



